

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 भाक्रवार

दिनांक 14.11.2025

प्रमुख समाचार –

- 1-बिहार म विधानसभा चुनई म राष्ट्रीय जनतांत्रिक गठबंधन एनडीए ऐतिहासिक जीत कोति बाढ़त हे- अब तक मिले परिणाम के अनुसार एनडीए ल करीबन दू सौ चार सीट म बढ़त मिले हे।
- 2-प्रदेस म काली ले किसान मनले समर्थन मूल्य म धान खरीदी सुरु होही- जम्मो केंद्र म तियारी कर ले गेहे पूरा।
- 3-भगवान बिरसा मुंडा के एक सौ पचासवां जयंती काली प्रदेस के जम्मो जिला म जनजातीय गौरव दिवस के रूप म मनाय जाही।

बिहार चुनाव-परिणाम

बिहार म विधानसभा चुनई म राष्ट्रीय जनतांत्रिक गठबंधन एनडीए जीत कोति बाढ़त हे। अब तक मिले रुझान अउ परिणाम के अनुसार एनडीए ल करीबन दू सौ चार सीट म बढ़त मिले हे। एमा भारतीय जनता पार्टी बयानवे, जनता दल यूनाइटेड चौरासी, लोक जनसक्ति पार्टी-रामविलास उन्नीस, हम पांच अउ आरएलएम चार सीट म बढ़त बनाय हुए हे।

बिहार म एनडीए गठबंधन ल मिलत ऐतिहासिक बढ़त म मुख्यमंत्री विष्णुदेव साय समेत भाजपा के वरिष्ठ नेता मन घोले बधई दीन हे। श्री साय ह किहीन कि दुनिया ल लोक तंत्र के शिक्षा दे वाले बिहार के जनादेस, लोकतंत्र अउ सुशासन के जीत हे।

उहें, उपमुख्यमंत्री अरुण साव ह किहीन कि बिहार के चुनाव नतीजा ऐतिहासिक हरय।

उपमुख्यमंत्री विजय शर्मा ह किहीन कि बिहार के जनता ह एक घांव फेर विकास के साथ देहे अउ सुशासन के संग खड़ा होय के फइसला लेहे।

अइसने, भाजपा के प्रदेस अध्यक्ष किरण सिंह देव ह बिहार विधानसभा चुनई म भाजपा एनडीए के सानदार जीत ल बिहार के सुशासन मॉडल बर ऐतिहासिक बतइन।

भाजपा के प्रमुख प्रवक्ता अउ सांसद संतोष पांडेय ह किहीन कि बिहार के जीत आम जनता के एनडीए ल मिले आसिर्वाद हे।

उहें, भाजपा के प्रदेस संगठन महामंत्री पवन साय ह ए जीत ल बिहार के जनता के आकांक्षा के जीत बतइन।

धान खरीदी

प्रदेस म काली ले किसान मनले समर्थन मूल्य म धान खरीदी सुरु होही। एखर बर जम्मो केंद्र म तियारी पूरा कर ले गेहे। मुख्यमंत्री विष्णुदेव साय ह अधिकारी मन ल स्पष्ट निरदसे दीन हे कि किसान मन ल धान बेचे म कोनो भी प्रकार के परेसानी झन होवय, एखर बिसेस धियान राखे जाय। ओमन खरीदी केंद्र म किसान मनके सुविधा बर सबो जरूरी बेवस्था सुनिश्चित करे के निरदसे घोले दीन हे। जम्मों जिला म कलेक्टर के मार्गदर्शन म सहकारिता, मार्कफेड अउ खाद्य विभाग डहार ले धान खरीदी बर इंतजाम करे गेहे।

उहें, मुख्यमंत्री विजय शर्मा ह किहीन कि प्रदेश म यहू दारी बहुत अच्छा बेवस्था के संग धान खरीदी अभियान पूरा करे जाही।

धान खरीदी बर दू हजार सात सौ उनचालीस उपार्जन केंद्र बनाय गेहे। इही बीच, राज्य म धान के अवैध परिवहन ल रोके बर दूसर राज्य के सीमा म चेकपोस्ट लगाय गेहे।

राज्य सरकार कोति ले किसान मनके सुविधा बर 'तुहर टोकन मोबाइल ऐप' घलो सुरु करे गेहे। ए ऐप के माध्यम ले किसान घर बइठे धान बेचे बर टोकन ले सकत हे, जेखर ले समिति मन म लंबा लाइन ले मुक्ति मिलही। समिति म माइक्रो एटीएम के बेवस्था घलो करे गेहे।

खाद्य अउ नागरिक आपूर्ति विभाग के सचिव रीना बाबा साहेब कंगाले ह बतइन कि किसान मनके समस्या के निदान बर विभाग कोति ले ट्रोल फ्री नंबर घलो जारी करे गेहे।

बातों बातों—में

प्रादेशिक समाचार एकांश के समसामयिक बिसय उपर आधारित कारीकरम "बातों-बातों-में" म ए दारी धान खरीदी उपर केंद्रित रइही। एखर तहत खाद्य अउ नागरिक आपूर्ति विभाग के सचिव रीना बाबा साहेब कंगाले ले लेगे भेंटवार्ता के प्रसारण करे जाही। ए कारीकरम के प्रसारण काली पंद्रह नवंबर के एफ.एम. अउ प्रायमरी चैनल म बिहनिया नौ बजे ले करे जाही। एला छत्तीसगढ़ स्थित आकाशवाणी के जम्मों केंद्र रिले करही।

निर्माण काम—निर्देश

लोक निर्माण के सचिव डॉक्टर कमलप्रीत सिंह ह समय—सीमा म काम पूरा नइ करने वाला ठेकेदार मन उपर पेनाल्टी लगाय अउ नोटिस जारी करे के निरदेस दीन हे। सचिव ह रईपुर अउ दुरुग परिक्षेत्र के अभियंता मनके बइठका म ए निरदेस दीन। ओमन जम्मो अभियंता मन ल गुणवत्ता उपर बिसेस रूप ले धियान दे अउ फील्ड म जाके निर्माण कार्य मनके नियमित निगरानी करे बर किहीन। ओमन विभागीय कामकाज म तेजी लाय बर जम्मो कार्यालय मन ल ई-ऑफिस के माध्यम ले काम करे बर किहीन। संघरा ओमन सड़क मरम्मत के जम्मो काम अगल महिना पूरा करे के निरदेस दीन।

भगवान बिरसा मुंडा—जयंती

भगवान बिरसा मुंडा के एक सौ पचासवां जयंती काली प्रदेश के जम्मो जिला म जनजातीय गौरव दिवस के रूप म मनाय जाही। जिला मुख्यालय म आयोजित होवइया जनजातीय गौरव दिवस कारीकरम म मुख्यमंत्री, मंत्री, सांसद अउ विधायक मुख्य अतिथि के रूप म मौजूद रिहीन। जनजातीय गौरव दिवस के मउका म प्रधानमंत्री नरेंद्र मोदी के संबोधन के सीधा प्रसारण अधिकारिक यूट्यूब चैनल अउ डीडी न्यूज के माध्यम ले होही, जेला देखे अउ सुने के बेवस्था घलो कारीकरम स्थल म होही। कारीकरम के दउरान मुख्यमंत्री विष्णुदेव साय के संदेस पत्र के वाचन होही। एखर अलावा कारीकरम म "पीएम जनमन", "आदि कर्मयोगी", "धरती आबा" जइसे योजना उपर आधारित लघु फिलिम घलो प्रदर्शित करे जाही।

मुख्यमंत्री विष्णुदेव साय जगदलपुर म राखे गे कारीकरम म सामिल होही। उहें, दुरुग म उपमुख्यमंत्री विजय शर्मा, बिलासपुर म उपमुख्यमंत्री अरुण साव, रईपुर म केंद्रीय राज्य मंत्री तोखन साहू अउ राजनांदगांव म विधानसभा अध्यक्ष डॉक्टर रमन सिंह कारीकरम म मुख्य अतिथि के रूप म मौजूद रिहीन।

ए कारीकरम म जनजातीय स्वतंत्रता संग्राम सेनानी के परिजन, जनजातीय समुदाय के परमुख अउ प्रतिभासाली विद्यार्थी मन ल सम्मानित करे जाही। जनजातीय संस्कृति, कला, व्यंजन, हस्तसिल्प अउ सरकार के जनकल्याणकारी योजना के प्रदर्शनी घलो लगाय जाही। स्कूल, आश्रम साला अउ अवासीय विद्यालय म घलो ए मउका म आने-आने कारीकरम आयोजित करे जाही।

मंत्रिमंडल-निर्णय

मुख्यमंत्री विष्णुदेव साय के अध्यक्षता म आज रईपुर म कैबिनेट के अहम बइठका होइस, जेमा कई महत्वपूर्ण निर्णय ले गीस। मंत्रिमंडल ह यहू दारी प्रधानमंत्री अन्नदाता आय संरक्षण अभियान के तहत किसान मनले समर्थन मूल्य म खरीफ अउ रबी मौसम म दलहन अउ तिलहन के खरीदी करे के निर्णय लेहे। ए फसल म अरहर, मूंग, उरद, मूंगफल्ली, सोयाबीन, चना, सरसों, मसूर सामिल हे।

उहें, सरकार ह ए साल काली ले सुरु होवइया धान खरीदी अभियान के तहत विपणन संघ ल अतिरिक्त ग्यारा हजार दू सौ करोड़ के रासि देके मंजूरी देहे।

मंत्रिमंडल ह सार्वजनिक उपक्रम विभाग ल वाणिज्य अउ उद्योग विभाग म संघरा बीस सूत्रीय क्रियान्वयन विभाग ल योजना आर्थिक अउ सांख्यिकीय विभाग म सामिल करे के निर्णय लेहे। एखर अलावा मंत्रिपरिषद ह दीनदयाल आवास योजना, अटल आवास योजना, अटल विहार योजना अउ मुख्यमंत्री आवास योजना के नियम म छूट प्रदान करे हे। एखर अलावा तीन गांव विज्ञापन दे के बाद ए भवन मन ल पात्र हितग्राही मनके अलावा कोनो भी आय वर्ग के हितग्राही ल बेचे जा सकत हे, लेकिन अइसे हितग्राही मन ल शासन डहार ले दे जाने वाला अनुदान के पात्रता नइ होही।

उहें, सरकार ह नवा रईपुर के शहीद वीर नारायण सिंह अंतर्राष्ट्रीय क्रिकेट स्टेडियम ल छत्तीसगढ़ राज्य क्रिकेट संघ ल अनुबंध के अनुसार लीज म देके घलो फइसला लेहे।

चिकित्सा शिक्षा-प्रवेश नियम

चिकित्सा शिक्षा विभाग ह चिकित्सा स्नातकोत्तर पाठ्यक्रम के प्रवेश नियम म महत्वपूर्ण संसोधन करे हे, जेखर अनुसार अब संपूर्ण काउंसिलिंग प्रक्रिया ऑनलाइन माध्यम ले चार चरण म आयोजित करे जाही। जम्मा चरण म पंजीकरण के सुविधा उपलब्ध रइही।

अब राज्य म पंडित दीन दयाल उपाध्याय स्मृति स्वास्थ्य विज्ञान अउ आयुष विश्वविद्यालय ले उत्तीर्ण विद्यार्थी मन ल प्राथमिकता दे जाही। काउंसिलिंग के पहिली चरण म चुने गे अभ्यर्थी मन ल दूसरइया अउ तीसरइया चरण म सीट अपग्रेडेशन के विकल्प मिलही। ईडब्ल्यूएस श्रेणी म छात्र उपलब्ध नइ होय के स्थिति म बांचे सीट अनारक्षित श्रेणी के छात्र मन ल मिल सकही। दूसरइया अउ अवइया चरण म सीट आंबटन के बाद यदि अभ्यर्थी प्रवेश नइ लेवत हे, त ओमन के जमा पंजीकरण रासि जब्त कर ले जाही।